



خطبة عيد الأضحى المبارك

Khutbah 50

So Bandingan ko Buka sa Hariraya

إِنَّ الْحَمْدَ لِلَّهِ نَحْمَدُهُ وَنَسْتَعِينُهُ وَنَسْتَغْفِرُهُ وَنَعُوذُ بِاللَّهِ مِنْ شُرُورِ أَنْفُسِنَا وَسَيِّئَاتِ أَعْمَالِنَا مَنْ يَهْدِ اللَّهُ
 فَلَا مُضِلَّ لَهُ وَمَنْ يُضِلِّ فَلَنْ تَجِدَ لَهُ وَلِيًّا مُرْشِدًا ، وَأَشْهَدُ أَنْ لَا إِلَهَ إِلَّا اللَّهُ وَحْدَهُ لَا شَرِيكَ لَهُ
 وَأَشْهَدُ أَنَّ مُحَمَّدًا عَبْدُهُ وَرَسُولُهُ ، اللَّهُمَّ صَلِّ وَسَلِّمْ وَبَارِكْ عَلَى مُحَمَّدٍ صَلَّى اللَّهُ عَلَيْهِ وَسَلَّمَ
 وَعَلَى آلِهِ وَصَحْبِهِ وَمَنْ اهْتَدَى بِهِدْيِهِ إِلَى يَوْمِ الدِّينِ ... وَبَعْدُ :

فَيَا عِبَادَ اللَّهِ يَقُولُ الْحَقُّ تَبَارَكَ وَتَعَالَى فِي الْقُرْآنِ الْكَرِيمِ:

وَالَّذِينَ جَاهَدُوا فِينَا لَنَهْدِيَنَّهُمْ سُبُلَنَا وَإِنَّ اللَّهَ لَمَعَ الْمُحْسِنِينَ (العنكبوت ٦٩)

Innalhamda lillāhi nahmaduhu wa nastaīnuhu wa nastagfiruh, wa na’ūdubillāhi min shurūri anfusinā wa sayyiāti a’ mālinā, man yahdihillāhu falā mudhillalahu, wa may yudhlil falan tajida lahu waliyyan murshidā, wa ash’hadu allā ilāha illallāhu wahdahu lā sharīka lahu, wa ash’hadu anna Mohammadan abduhu wa rasūluh, Allāhumma salli wa sallim wa bārik alā Mohammadin sallallāhu alayhi wa salallama wa alā ālihi wa sahabihi wa manihtadā bihad’yihi ilā yawmidd dīn... wa ba’du:

Fayā ibādallāhi, Yaqūlul Haqqu Tabāraka wa Ta’ālā fil Qur’ānil Karīm:

Walladīna jāhadu finā lanahdiyannahum subulanā wa innallāha lamaal muhsinīn. (Al Ankabut 69)

Allāhu Akbar, so Allāh na lbi a Mala a inipangalimo tano niyan ko kinisampay tano sankai a gawii a babarakatn, gīai so gawii a kariale o Muslim a inisnggay o Islam a dowā a mala a gawii a inisogo iyan so kakhālamilami ran ago so kababaya iran ko kapzagad iyan kiran a siran so dowā a Buka a so buka sa powasa “*Eid al Fitr*” ago giankai a “*Eid al Adh’ha*” a pmbthowan tano sa buka sa hariraya.

Manga oripn o Allāh, giankai a manga ala a gawii tano na pzagad ko oriyan o katonaya tano ko manga ala a simba tano ko Allāh [s.w.t] a pd ko manga polaos o Islam, ka so buka sa powasa na khaadn ko oriyan o kiatonaya tano ko manga simba ko agama a skaniyan so kiapowasai tano ko Ramadhan, na bialoy o Allāh [s.w.t] a so buka sa powasa na kariale oto o manga Muslim a miaromasay siran ko kiapamowasa iran sa pkhālamilami siran sa kapipia ginawa ka an iran magdam so kala o limo o Allāh [s.w.t] sii kiran.

Gia pman ankai a buka sa hariraya, a so Eid al Adh’ha na pkhaadn ko ika sapolo ko olanolan a Dhul Hijjah, a so manga Muslim a nomanayk na miapasad iran dn so kiatonaya iran ko pinakamala a rokon o Hajji so ka oqup sa Arafah ko alongan a ika siyaw ko Dhul Hijjah, na so kiapita iyan na khaadn ankto a kariyala a bithowan sa kariale a kakhorban, ka kagia so manga nomanayk na zombaliin iran so manga korban iran ko darpa a pazombalian on sa Makkah, sa soasoat iran ko Kadnan iran a Rabbul Alamin. Sa so mambo so manga Muslim ko pirikharikhaban o doniya na gii siran khorban sa soasoat ko Allāh [s.w.t].

Manga oripn o Allāh, giankai a gawii a Eid al Adh'ha na giai so gawii a kakhorban, a maana a kasombali sa ayam sa soasoat ko Allāh [s.w.t], iniiza ko Rasūlullāh [s.a.w] so manga pipia a simba na pitharo iyan a aya mapia a simba na so kakhorban sa binatang a phakatoronn so dara (rogo) iyan ko kasombalia on sa soasoat ko Allāh [s.w.t], aya sabap anan na kagiya so manga pananakoto ko manga Arab, na pphanombalian iran sa manga korban so manga katuhanan iran a barahala, sa soasoat iran on, na da oto kasoatn o Allāh [s.w.t] o ba so inadn iyan a binatang na sombaliin sa korban ko salakaw ron a da on adn ka skaniyan na inadn pn o Allāh [s.w.t] a kna o ba tuhan, na so kakhorban o taw sa ingaran o Allāh [s.w.t] na gioto na katankd a mataan a so siombali iyan a binatang a inizoasoat iyan ko Allāh [s.w.t] na rk oto o Allāh [s.w.t] ka skaniyan i miadn on a patot a sii rkaniyan mizoasoat sa di ron pd so salakaw ron. Misabap san na mimbalo so kakhorban a pd ko manga ala a simba sii ko Islam, ka kagiya pphakitanodan iyan so maana o tawhid, a kapakaisaisaa ko Allāh [s.w.t] ko kapzimbaa on.

Manga oripn o Allāh, giankai a gawii na ipphananadm ko isa a pamiliya a ama ago ina ago wata a siran oto a pamiliya na tinindos siran o Allāh [s.w.t] ko manga taw ko doniya sabap ko kiapromasay ran ko agama o Allāh [s.w.t], sa mianarig siran on sa tarotop a sarig, sa inibgay ran so mala i arga a nganin sa korban ago soasoat ko kabaya o Allāh [s.w.t]. Pitharo o Allāh [s.w.t] a:

وَالَّذِينَ جَاهَدُوا فِينَا لَنَهْدِيَنَّهُمْ سُبُلَنَا وَإِنَّ اللَّهَ لَمَعَ الْمُحْسِنِينَ (العنكبوت ٦٩)

So siran oto a miromasay siran sa mianagontaman siran sa katoona rkami, na matatankd a theroon ami siran ko manga lalan (a khitoon) rkami, go mataan a so Allah na pd iyan so manga taw a giiphiapiya. (Al Ankabut 69)

Gianan so pamiliya a miatindos a miamankolong ko pandi o kapakaisaisaa ko Allāh [s.w.t] ko liawaw o lopa ko masa a da dn a taw a salakaw kiran a ba iran aawidi so panolon o Islam. Giankai a kadaklan ko manga simba (manasik) o Hajj na ipphananadm kiran ka an di pkhalipati so kiapromasay ran sa makowa siran a ladiawan a mapia a pzayanan o Muslim a gopn phakasalono.

Giankanan a pamiliya na gianan so ama a tinindos o Allāh [s.w.t] a Nabi a bolayoka iyan a so Ibrahim [a.s.], so karoma na skaniyan so maonotn a bai a barasabar a so Hājar, na so wata a bilangataw a mapantang na skaniyan so Ismail, a so kapphananadmi kiran ko kapia o manga galbk iran na inidakat o Allāh [s.w.t] ko kitab iyan a Qur'an a pkhabatiya o manga taw sa taman ko kagba o doniya, sa so bantogan iran na di khasalongan sa di khaonaan ago di khasaloba, ka oman thmg so musim na ba dn pphamagoman sa ipangoranka niyan, a di dn kharombay so kababago niyan, ka oman lomimpa so masa na so kapkhathay niyan na aya on gii pharas sa imbagobago niyan.

Giankai a pamiliya a paganay a mawid ko agama a kapakaisasaa ko Allāh [s.w.t], na oman i isa kiran na adn a mala a sangan iyan ko kiatharagombalaya on ago so kiapakabkn iyan ko liawaw o lopa. So Ibrahim [a.s.] na katawan so thotolan on a skaniyan na taw sa Ur sii sa Iraq a isa nan a mabagombar a ingd ko masa niyan na so kiatoroa on o Allāh [s.w.t] sa miaknal iyan so bnar a tuhan na diolon iyan so pagtaw niyan a barasimba sa barahala a pd on si ama iyan na da niyan siran matoro sa mianinggaposan so btad iyan ko kiatotonga iran on ko makadg a rapog, sa miailay ran so tanda a mapayag ko da niyan katotong, na da siran paratiaya na gianatan iyan so ingd a pilombayan sa romiapo ko mawatan a ragat on sa mianginsdpan sa kaomag sa Canaan, taman sa inisampay sa lopa a Misir, a pd iyan so karoma niyan a Sārah, na gowani a khadiatan sa marata o dato sa Misir so Sārah sabap ko kataid iyan a bai, na da pakambatasa o Allāh [s.w.t] so gasta iyan on, na inibgay niyan on so wata iyan a bai a so Hajar, na miapangaroma o Ibrahim [a.s.], na gowani a makambalingan siran sa Canaan sa mimbawata so Hājar, na kiasiiban so Sarah ko di niyan kapmbawata na piangni niyan ko Ibrahim [a.s.] a ipakawatan iyan siran, na gioto i sabap a inilalakaw siran o Ibrahim [a.s.] sa minisampay siran sa lopa a Makkah.

Manga oripn o Allāh, so langowan a giimanggolawla na palaya dn matatago sa ilmo o Allāh [s.w.t] a di katawan o manosiya so phakambowatn iyan on a mapia sii ko pkhaori a masa, opama o

sii pagilaya ko rinayagan o bontal na di mapia oba taogn so karoma ago so wata ko darpa a da a ba on siringan ago daa pakaig on antaa ka pamomolan a khasarindongan, ogaid na sabap ko hikmah o Allāh [s.w.t] na giimanggolawla so da sa itongan o manosiya.

Gowani a mioma siran o Ibrahim [a.s.] ko balintad a malilibt a manga palaw na so kapantaran iyan na adn a miboboto ron a lopa a adn a sapoon on a kayo na inibagak iyan siran on a pd iran so loto iran a gango a korma ago so kalonkong a kobal a tatagoan sa ig, na kagia tomalikhod so Ibrahim [a.s.] na da niyan siran dn dingili sa lomialakaw dn na tiawag o karoma niyan a Hājar sa tig iyan a ino kami nka sii mbagakn, na da dn smbag, na kagia kawatanan na tiawag o Hājar sa pitharo iyan a: Hay Ibrahim, ba rka ini pandoan o Kadnan ka, na dominingil so Ibrahim [a.s.] sa liankaw niyan siran sa pitharo iyan a: Oway, na pitharo o Hājar a so Allāh [s.w.t] na di kami niyan pagilangn sa ba kami madadas, sa mizalimbotawan ko Kadnan iyan a Masalinggagawn, sii sankoto a masa na so Ismail na maito pn a ikaririga a pzoso.

Na gowani a kadalongan kiran so Ibrahim [a.s.] na liangag iyan a langit na iniporo iyan so mbala a lima niyan sa pitharo iyan a:

رَبَّنَا إِنِّي أَسْكَنْتُ مِنْ ذُرِّيَّتِي بُوَادٍ غَيْرِ ذِي زَرْعٍ عِنْدَ بَيْتِكَ الْمُحَرَّمِ ، رَبَّنَا لِيُقِيمُوا الصَّلَاةَ فَاجْعَلْ أَفْتِدَةً مِنَ النَّاسِ تَهْوِي إِلَيْهِمْ وَارْزُقْهُمْ مِنَ الثَّمَرَاتِ لَعَلَّهُمْ يَشْكُرُونَ (إبراهيم ٣٧)

Kadnan ami mataan a sakn na piakabaling akn so moriataw akn sa balintad a daa babasoka on (gia Makkah) sii ko walay nka a sslaan, Kadnan ami ka an iran mipamayandg so sambayang na adn ka sa manga poso o sabaad ko manga taw a magagawi kiran, go rizki inka siran sa pd ko manga onga a sapad ka oba siran makapanalamat sii rka. (Ibrahim 37)

Sii sankanan a btad na inraw dn o Ibrahim [a.s.] so kaganati niyan ko karoma a darodopa a bilangataw a maonotn ago so wata iyan a bago a mama a onga o poso iyan a aya niyan bo wata ko kinitolod dn o omor, a katawan tano so anogon o ama ko wata iyan a mama a bothong pn, na so kabaya iyan ago so ranon iyan ko pamiliya niyan na aya niyan dn korban sa gii niyan kapromasay sa pantag sa kapakamoayan o panolon iyan a Tawhid, so kapakaisaisaa ko Allāh [s.w.t] ko kasimbaa on, sa mimbalingan skaniyan sa Palestine.

Skaniyan oto a ina a bilangataw a so Hājar na tionay niyan so sangan iyan ko kiaritana niyan ko ikaritan iyan a so Ismail sa tarotop so pananarig iyan ko Allāh [s.w.t] sa di niyan siran pagilangn, na da mathay so masa na mialngan so ig a loto iran na riaot dn a kawaw so Islamil, sa miagaropasay dn, na kagia kaorowan so Hājar na miakatikharas na liankaw niyan so sabala a kilid o palaw ko balintad na mianizakay sa kaphlalakaw niyan ka oba on makatoon sa makatabang on ko mambbtad o wata iyan, na kagia maoma niyan so sabala a katampar o balintad na komiasoy pman ko phoonan iyan sa inisampay sa miakapito niyan makasoy na inidaplak a dokaw ago apos, na da mathay na miakagdam sa rapandas, na miakapananawag sa pitharo iyan a: Ba adn a phanabantabang? Na miailay niyan a manosiya a gioto so Jibril a zasaln sa mama na pitharo iyan on a adn a magmbowat a pakaig a miphamakaig iran ago adn a pmbalayin a walay sankai a darpa a walay o Allāh [s.w.t], na inidasl iyan a palo niyan ko lopa na miakambowat on so ragiray a maito a ig, na pinggagaan o Hājr sa pphangakopn iyan oman somolapay ago linibt iyan a maroni a ator ka oba matangl sa di tomoga sa mada ankoto a maito a ragiray. Pitharo o Rasūlullāh [s.a.w] a opama ka so Hājar na piakambaya iyan so ig ko kaphthoga iyan na khabaloy so ig a Zam Zam a lawas a ig a pthoga sa mapayag.

Sii ko kiaadn ankoto a pakaig na miakaoma so manga papanok a giisiran on phapaigo, na adn a salompok a tomtmbng a manga taw sa Yaman a pd ko pakatopo a Jurhum na miakasagad siran ko marani sankoto a balintad na miailay ran so manga papanok a pkhaboliok siran sankoto a darpa, na inantok o isa kiran sa gioto na papata sa adn a ig roo, na siogo iyan so isa kiran sa amadn iyan, na miaoma niyan so ig a Zam Zam ago so Hājar a pd iyan so wata iyan a Ismail, na minggagaan

komasoy sa inilapoy niyan ko manga pd iyan so miailay niyan, na so kaitokawi ran on na siongowan iran so Hājar na piangni ran on a roo siran dn maling a pd iyan, na miniog ogaid na inisarat iyan kiran a so pakaig na rk iyan sa da a kabnar iran on oba iran mamilik sa maradika siran ko kaphaginom on, na miakaayon siran. Ipoon roo na kiatagoan sa taw a Makkah, na so kiapakala o Ismail na sii kiran dn miabatak ko katharo sa basa Arab, ka kagia so manga Jurhum na bangnsa siran a Arab, na so Ismail, na kna o ba Arab ago so ina iyan na taw sa Misir a kna a ba Arab.

Gowani a phmamangoda dn so Ismail na miakaoma si ama iyan, na so kiailaya niyan ki ama iyan na inalaw niyan sa pizakasakaw niyan, na sii sankoto a masa na mithataginp so Ibrahim [a.s.] sa pikhorban iyan so wata iyan a mama, na kagia makanaw na tialowan iyan so wata iyan a bothong sa pitharo iyan on a ikaritan ko miailay akn sa taginpn a giiko ska khorbann na antonai mapipikir ka, na pitharo o wata iyan a:

فَلَمَّا بَلَغَ مَعَهُ السَّعْيَ قَالَ يَا بُنَيَّ إِنِّي أَرَى فِي الْمَنَامِ أَنِّي أَذْبَحُكَ فَانظُرْ مَاذَا تَرَى ، قَالَ يَا أَبَتِ افْعَلْ مَا تُؤْمَرُ سَتَجِدُنِي إِنْ شَاءَ اللَّهُ مِنَ الصَّابِرِينَ (الصافات ١٠٢)

Na gowani a isampay so (Ismail) ko omor a miphagonota iyan na pitharo iyan a Ibrahim a: Hay wata ko giiko thataginpn a pzombaliin akn ska (a korban ko kabaya o Allah) na pamimikiran ka o antonai smpag ka. Na pitharo iyan a (Ismail) a: Hay amakolay, nggolawla anka dn so nganin a ipzogo rka (o Kadnan ka) ka khatoon ako nka dn omiog so Allāh [s.w.t] a pd ko manga barasabar (a tharimaan akn so kakhorbana nka rakn).

(As Saffat 102)

Gianan i sangan o wata a bilangataw sii ko gii kapromasay ko katoona ko Allāh [s.w.t] sa so dn so kaoyagoyag iyan i imbagay niyan a sanang a maliwanag ko kapkhorban iyan, a gianan i pithamanan a maporo a kakhorbana a so dn so ginawa na aya dn indawag o manosiya sa tolos ikhlas ko kabaya o Allāh [s.w.t], na lomialakaw siran ambataa ko kapzong iran ko darpa a zombalian iyan ki wata iyan na sii ko kaphlalakaw iran na ooradn siran o shaytan a zosalin sa papanok na pillbad skaniyan o Ismail ago si Ama iyan a pipihito a manga ator a gianan so tlo a darpa a pmbthowan sa Jamarat sii sa Mina a phlbadn o nomanayk sa pananadm sankoto a btad.

Gowani a makaoma siran ko darpa a zombalian iyan ko Ismail, na piakagpha niyan sa isosodod iyan a paras iyan ko lopa sa nggamitn o Ibrahim [a.s.] sa lig iyan so glat iyan ko kazombalia niyan on, sa o misompit so rogo ko kapotol o bakrng na sii khisompit sa baba sabap ko kapakaggha niyan sa di mitarsik. Pitharo o Allāh [s.w.t] a:

فَلَمَّا أَسْلَمَا وَتَلَّهُ لِلْجَبِينِ ، وَنَادَيْنَاهُ أَنْ يَا إِبْرَاهِيمُ ، قَدْ صَدَّقَتِ الرُّؤْيَا ، إِنَّا كَذَلِكَ نَجْزِي الْمُحْسِنِينَ ،
إِنَّ هَذَا لَهُوَ الْبَلَاءُ الْمُبِينُ ، وَفَدَيْنَاهُ بِذَبْحٍ عَظِيمٍ (الصافات ١٠٣-١٠٧)

Na gowani a zalimbotawan siran a dowā ko Allāh [s.w.t] (sa zombaliin iyan dn so Ismail) na piakagpha niyan ko bn'ng iyan, na tiawag ami skaniyan a hay Ibrahim sabnar a miatoman ka so taginpn ka, na mataan a skami na datar oto a mbalasan ami so manga taw a giiphiapiya, mataan giai na skaniyan so tpng a mapayag, na sianggar ami skaniyan a (Ismail) a binatang a kokorbann a mala (a gioto so kibas a miasombali o Ibrahim).

(As Saffat 103-107)

Isa a thotolan on na da niyan masombali na miailay niyan so kambing ko obay niyan na aya niyan miasombali a sambu o Ismail, so isa a thotol na miapakasagad iyan on so glat iyan a magarang ogaid na da niyan dn otngi so lig o Ismail, na kagia makapira niyan dn oto manggolawla na mianingidingil na miailay niyan a kambing na miatankd sa akal iyan a gioto i mapkhorban iyan sa wahi o Allāh [s.w.t].

Manga oripn o Allāh, giangkaya a mianggolawla na kadadalman sa madalm a ongangn a patot a masabot o adn a pikir iyan a kalodan i rarb, ka so kapphanothola saya na kna o ba matag domana a iphlilang sa darm, aya mataan na pphanotholn aya ka an makowa so ongangn a madalm a matotonkop sankai a thotol.

Manga oripn o Allāh, isa a ongangn a madadalm sankanan a thotol, na so kakhakowaa ko kasosoat o Allāh [s.w.t] ago so kapakaapas ko panagontaman na kaphroromasayan, sa khaosaran sa galbk a mapnd a thogaan a ating ago rogo ago kaoyagoyag, so Ibrahim [a.s.] na pikhorban iyan so gagaw niyan ago so ranon iyan ko kiaganati niyan ko pamiiya niyan sankoto a darpa, na so Hājar na piakatoga iyan so ating iyan ko kiaploba iyan sa ig a mainonm o wata iyan sa taman sa inikopay ko miakapito makakhasoya ko pagltan o dowa a palaw, na so Ismail na so dn so kaoyagoyag iyan ko masa dn a kababagombar o kangongodai ron na aya niyan dn inibgay a sanang a maliwanag sa pantag sa kiapas o panolon.

Manga oripn o Allāh, ba di khagaga o Allāh [s.w.t] a ipangalimo iyan ankai a familiya ko da iran pn kapakaokit sankai a pizoson a margn a kiasagadan iran? Aya smbag na khagaga o Allāh [s.w.t] ka so Allāh [s.w.t] na Gaos a daa margn on ogaid na sabap ko hikmah niyan a maporo a iphangndao niyan ko manga oripn iyan na gianan i mianggolawla, aya katitinsan san, Manga oripn o Allāh [s.w.t], na so Muslim, na makaphrasarasay, makaphanagontaman, makaphanamar, maka-phanizakay, makapphrang ko kapagawidi niyan ko panolon o Islam, sa odi niyan kaokiti so pizoson a margn sa di marompi ko randasan o manga tpng ko kaoyagoyag na margn o ba adn a kasampayan ko panolon iyan.

Manga oripn o Allāh, Gowani a imbawata o Maryam so wata iyan a Īsā ko atag o korma na kagia raotn a kaor ago kawaw na miamangni ko Allāh [s.w.t] sa panabang, na inisogo on o Allāh [s.w.t], a kadasli niyan ko itado o korma, na katawan tano a so korma na isa dn a kayo a mabagr i katho, na aya ndasl on na so babay a malobay sa taman a malobay a mimbawata pn a somiagad sa mabagr a balilit ko kiambawata na tharimaan a akal a so bagr o dasl iyan na khatatak iyan so onga o korma, aya smbag na di, ogaid na so bagr o Allāh [s.w.t] na di kharn asar ka manggolawla so sabap a so galbk, na so kiadasli o Maryam ko itado o korma na inisabap on o Allāh [s.w.t] a tiagthr so korma na miatatak so onga niyan a piangalolotoan ko Maryam na aya niyan minipagpr, Manga oripn o Allāh [s.w.t], khapakay man a matatak so onga o korma sa mokit sa sambr a sobosobo odi na pd a sabap, ogaid na da manggolawla ka aya hikmah o Allāh [s.w.t] na so galbk na makapoon ko taw a makapagoongaya sa maosar iyan so panamar iyan a kalalawasi sa so dn so Maryam i siogo o Allāh [s.w.t] a makadasl ko itado o korma.

So Hājar ko kapphloba iyan sa ig na khapakay man a domogayas so langit sa oran a margs a kasabapan ko kaadn o ig, odi na makambowat so ZamZam ko da niyan pn kapanizakay ko blangan o balintad, ogaid na da manggolawla oda makazai so Hājar sa miakapito ko blangan o balintad sabap ko hikmah o Allāh [s.w.t] a phakisabotan iyan ko manga oripn iyan. A aya ki a makaphragon na so taw a mimbosok, aya phakakowa na so taw a minggalbk, na so pman so boklo na koris bo a magagamak iyan.

Manga oripn o Allāh, anda dn i masa a khasabot o Muslim ankai a ongangn a madadalm ko manga thotolan o Qur'an!?

Aya pamotosan ankai a Khutbah tano a pianothol tano a so btad o Ibrahim [a.s.] ago so karoma niyan na samporna ko wata iyan a mama, na skaniyan so kaphagoyaga tano ko pamikiran sa maadn ko Muslim sa masa ini so sabot a madalm ago matolangd sii ko Islam a iphangndao niyan rkitano so kabaloy tano a manosiya a barasimba a pagagalbk ko mapia a di niyan katawan so bokl ago so kabbgatan, ka giankai a masa na masa ini a da dn a kipantag on o taw a boklo a malmk a padokaw a di khabaya mlogat.

Manga oripn o Allāh, o kabaya tano a mipagintaw tano so agama tano a Islam a mabaloy a aya tano parinta a magator ko kaoyagoyag tano sii ko manga ingd tano, na pagadimatn tano ankanan

a Hikmah a madadalm sankai a thotol a lalayon ai giikhasokasoy ko oman maoma ankai a Eid al Adh'ha sa pphagarapn tano ko Allāh [s.w.t] a pphagomanomanan iyan so paratiaya tano ago so panamar tano sa giikatharagombalaya ko parinta o Islam ko manga ingd tano.

Manga oripn o Allāh, mliyo tano sankai a masjid na da dn a sakataw rkitano inonta a kialrilaan iyan so pagari niyan sa da dn a manga karido ago daa manga rarangit a migagadong ko manga poso tano, ka gianan i paganay a poonan o kakhaadn rki tano o bagr a mapangingindaw tano sankai a masa imanto.

Manga oripn o Allāh, pangnin tano ko Allāh [s.w.t] a balowin tano niyan a pd ko manga taw a pphamakin'gn iran so katharo na phagonotan iran so lbi ron a mapiya.

وَأَقُولُ قَوْلِي هَذَا وَأَسْتَغْفِرُ اللَّهَ لِي وَلَكُمْ وَلِسَائِرِ الْمُسْلِمِينَ مِنْ كُلِّ ذَنْبٍ فَاسْتَغْفِرُوهُ إِنَّهُ هُوَ
التَّوَّابُ الرَّحِيمُ

Wa aqūlu qawlī hādā wa astagfirullāha lī wa lakum wa lisāiril Muslimīn min kulli dambin fastagfirūhu innahu Huwat Tawwābur Rahīm.

DOWAA KO IKA DOWAA KHUTBAH

Manga oripn o Allāh, mangndod tano ko **Allāh** ago magapas tano ron sa mamangni tano ron sa rila.

Ya **Allāh**, mapapadalm kami imanto sa ngkai a walay ngka sa pantag sa giiami rka kazoasoata na rilai kami ngka ago rila ingka so manga loks ami ago rila ingka so kadandan o manga muslim so miyamatay kiran ago so oyagoyag kiran,

Ya **Allāh**, pakabagr angka so paratiyaya mi rka ago ompiya ngka so btad ami sa baloy angka so imanto ami a mapiya a di so kagai ami, na so mapita ami na mapiya a di so imanto ami,

Ya **Allāh**, kalimoon ka mingka ago lindinga kami ngka sa awata kamingka ko manga sakit ago piya angka so pphangasakit rkami, ago pakabayad angka so makambabayadan rkami, na pakakhawasa angka so manga mmmr rkami, na pakandiyakat angka so manga kawasa rkami, na timo angka so kasasagomparak ami, na bagr angka so malobay rkami, na ayon ingka so manga dato ami sa aya manggalbk iran na so kamapiyaan ami ago so Islam,

Ya **Allāh**, pakadaag angka so ronda o **Islam** sa madaag ami so manga ridoay o agama ngka sa tatap angka so manga palo ami sa maydan ago bgan ka rkami a limo a makapagintaw kami ko agama ngka ago mapakatindg ami so parinta Islamiyyah ko manga poso ami a go sii ko manga ingd ami.

Ya **Allāh**, tabangi kami ngka ko kaptadmi ami rka ago so kapiya o kapzimbaami rka, Ya Allah, pakiilayin ka rkami so bnar na dograan ka rkami so kaonoti ami ron, na pakikilalan ka rkami so batal, na dograan ka rkami so kapanangilai ami ron.

رَبَّنَا آتِنَا فِي الدُّنْيَا حَسَنَةً وَفِي الْآخِرَةِ حَسَنَةً وَقِنَا عَذَابَ النَّارِ.

Ya **Allāh**, bgi kami ngka ko doniya sa mapiya ago sii ko akhirat sa mapiya ago lindinga kami ngka ko siksa ko naraka.

Ya **Allāh**, kalimoon ka so Nabi ami a Muhammad ago so manga pamiliya niyan ago so manga sahabah niyan sa kalangolangan iran, wal hamdulillahi rabbil alamin.

Aqimus salah.....